

Na osnovu čl. 4.2, 4.7. i 7.5. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 57. Pravilnika o licencama ("Službeni glasnik BiH", broj 87/12), Državna regulatorna komisija za električnu energiju, na sjednici održanoj 18. decembra 2014. godine, donijela je

ODLUKU

O UKIDANJU LICENCE ZA DJELATNOST MEĐUNARODNE TRGOVINE ELEKTRIČNOM ENERGIJOM

- (1) Ukida se licenca Društvu "KORLEA" d.o.o. Mostar za obavljanje djelatnosti međunarodne trgovine električnom energijom, izdata Odlukom Državne regulatorne komisije za električnu energiju broj: 05-28-12-254-18/10 od 27. januara 2011. godine.
- (2) Ova odluka stupa na snagu danom donošenja i bit će objavljena u "Službenom glasniku BiH" i službenim glasilima entiteta.

Obrazloženje

Društvo "Korlea", d.o.o. Mostar, vlasnik je licence za obavljanje djelatnosti međunarodne trgovine električnom energijom, izdate Odlukom Državne regulatorne komisije za električnu energiju broj: 05-28-12-254-18/10 od 27. januara 2011. godine. Sastavni dio licence su i Uvjeti za korištenje licence za obavljanje djelatnosti međunarodne trgovine električnom energijom.

Shodno navedenim Uvjetima, vlasnik licence je obavezan da permanentno održava ekonomske i finansijske sposobnosti tokom cijelog perioda trajanja licence.

Podnošenje prijedloga za otvaranje stečajnog postupka od strane samog vlasnika licence, međutim, ozbiljno je dovelo u pitanje stabilnost i platežnu sposobnost vlasnika licence. Nadalje, očigledna ekonomska i finansijska nesposobnost u dužem periodu iskazuje se i propuštanjem plaćanja regulatorne naknade propisane Odlukom DERK-a ("Službeni glasnik BiH", broj 73/13), iako je od strane DERK-a, vlasnik licence u više navrata pozivan na izmirenje utvrđenih obaveza.

Imajući u vidu navedeno, DERK je, shodno svojim ovlaštenjima utvrđenim članom 4.2. Zakona o prijenosu, regulatoru i operatoru sistema električne energije u Bosni i Hercegovini izvršio suspenziju licence, te pokrenuo postupak ukidanja licence, o čemu je vlasnik licence obaviješten aktom broj: 05-28-12-360-7/14 od 20. novembra 2014. godine.

U skladu sa članom 57. Pravilnika o licencama, u dnevnim novinama i na internet stranici DERK-a objavljena je kratka obavijest za javnost u kojoj su sumirani razlozi za pokretanje postupka ukidanja licence, upućen poziv zainteresiranim licima da mogu podnijeti zahtjev za stjecanje statusa umješaača, te određen rok do 6. decembra 2014. godine za dostavljanje pismenih komentara.

DERK je konstatirao da nisu dostavljani komentari javnosti u vezi pokrenutog postupka za ukidanje licence, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješaača.

Osim što je, prema pravilima i propisima DERK-a, propuštanje plaćanja regulatorne naknade samo po sebi razlog za ukidanje licence, isto je čvrsta i pouzdana indikacija da na strani vlasnika licence izostaje ekonomska i finansijska sposobnost da ispoštuje obaveze utvrđene

Uvjetima za korištenje licence za obavljanje djelatnosti međunarodne trgovine električnom energijom, suprotno odredbi 3.1. i 7.1. Uvjeta.

Navedeno je dala osnova DERK-u da pripremi nacrt odluke o ukidanju licence, uz omogućavanje vlasniku licence i drugim zainteresiranim članovima javnosti da iznesu svoje komentare i na općoj raspravi obavljenoj 11. decembra 2014. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenata na internet stranici DERK-a.

Na održanoj općoj raspravi izostalo je prisustvo bilo kojeg lica čiji su komentari mogli utjecati na donošenje drugačije odluke, pa i predstavnika samog vlasnika licence. Osim što se uzdržao prisustva općoj raspravi vlasnik licence tokom cijelog provedenog postupka ukidanja licence nijednom svojom radnjom nije negirao činjenice o svom sadašnjem ekonomskom i finansijskom kapacitetu, proturječio namjeri DERK-a da mu ukine licencu ili manifestirao volju da istu nastavi koristiti.

Cijeneći da ekonomska i finansijska nesposobnost licenciranih subjekata može imati negativne konsekvence po druge subjekte u sektoru električne energije, funkcioniranje tržišta električne energije i kvalitet snabdijevanja električnom energijom, na osnovu člana 57. stav (1) Pravilnika o licencama, odlučeno je kao u dispozitivu ove odluke.

U skladu sa članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana objave ove odluke.

Broj: : 05-28-12-360-18/14

18. decembra 2014. godine

Tuzla

Predsjedavajući Komisije

Nikola Pejić